



中復書全集

十四

和  
854  
14



姚氏先德傳敘

語曰前事不忘後事之師易傳曰君子以多識前言往行  
夫賢者於古今遐邇名德碩人之事猶將萃諸簡編以爲  
表式乃詢其祖宗之事罔焉無有聞知獨非惑與籍談敷  
典忘祖春秋譏之謝靈運作詩稱述祖德異代猶錄其詞  
由是觀之從古哲人其拳拳於先德且更有篤於此者也  
不有敎之誰能與之世有祖宗之先疇做廬則子孫爭之  
以爲世業而於立德立功之事曾不競爲纂述俾大章徹  
於世以明紹開所由何其薄也吾祖始自餘姚元季遷桐  
城餘姚以前事莫可考桐城始得著者曰勝三公居大有  
鄉之麻溪故爲麻溪姚氏勝三公子子華又名文二文二  
公子仲義仲義公子顯四世皆有隱德孝友力田讀書好

義施予無吝顯公子旭明景泰中以進士爲刑科給事中  
雲南布政使參政參政五子其三楫生子五其次琛子  
希廉是爲蔡軒公自明季以來讀書仕宦人物稱盛者皆  
蔡軒後也錄其尤盛行事可爲子孫法者著於篇

人受天地之中厥有恆性踐而守之或懷然以完忠或婉  
愉以全孝或溫篤在躬德器深厚或好善及物施濟肫仁  
可以盡性可以風世敘行義傳一

明德之後必有達人或顯

中朝忠盡翼翼或仕外吏遺愛在民匪惟君子之澤亦邦  
國之光也敘仕績傳二

仁義道衰學流於佚淺聞林守鄙陋貽議博雅爭鳴鴛末  
忘本至其甚焉毀蔑義理攻訐程朱一世風行羣倫波靡

亦人心世道之憂也守先待後雅正自持敘儒學傳三

五行之秀實鍾斯人華實樞機故充靈府抉勝藝林搜奇  
造化雖無關於行誼允焯美於知言華國有資詎能遺棄  
敘藝文傳四

羲皇代遠渾沌難期生乎今之世而曰反古之道倍矣然  
高山深林其中或有抱璞君子守貞懷一寄躡高遐於以  
葆其天真遊於熙皞者亦未俗之鍼砭也敘隱逸傳五  
從一而終婦人之義然閨房之內其事暗蔽情動於中物  
誘於外而能以禮自持至死不愧此丈夫之所難也婦人  
女子無師友之助道義之業固守其志於幽獨之中綱常  
風化孰有大於此者乎敘貞節傳六終焉

嗟乎小子不德無能砥節立行仰承先澤敘錄至此不禁

姚氏先德傳

敘

較等而愧歎也今著此編豈惟以彰前人之徽美宗閔之  
焜耀哉奔走四方莫能載其家乘庶幾以時省覽仿而行  
之冀萬一之有似爾十八世孫瑩謹述

姚氏先德傳

目錄

行義卷之一

先勝三公

先文二公

先仲義公

先宗顯公 諱顯

景明公 和

松窩公 場

栗岡公 璧

先葵軒公 諱希廉

南車公 承虞

養和公 祖虞

夢弧公 之蘭

崑源公 之章

仁山公 孫枚

曉峯公 文煥

蟄存公 文龍

東膠公 士賢

荆啟公 孔錚

桃溪公 孔欽

髯樵公 孔欽 容齋公 興淙

恕齋公 孔鈇 荔香公 馨

先春樹公 諱樹元

仕績上卷之二

先參政公 諱旭 湘潭公 之騏

先副使公 諱之蘭 尙寶公 孫榮

先職方公 諱孫棐 階州公 文熊

楚雄公 文烈 先端恪公 諱文然

德安公 文燕 峽江公 文焱

開化公 文燮 渝川公 士重

刑部公 士堅

仕績下卷之二

先羅田公 諱士基

朝邑公 士塾 雅州公 銳 合州公 孔鏞

處州公 孔鎰 贛州公 孔梓

葭州公 孔鎰 曹州公 興滇

杭嘉湖公 淮 黃沁公 仲

辰沅公 興潔 孟縣公 肇修

中丞公 葵 南甯公 義輪

儒術卷之四

克齋公 希顏 先似葵公 諱自虔

澤亭公 士蕃 先薑塢公 諱範

惜抱公 鼎

文藝卷之五

丹楓公 文勳

敬齋公 士堂

玉璿公 士在

湘門公 士封

虛堂公 興泉

于巢公 孔綱

問松公 喬齡

隱逸卷之六

先杏林公 黃楫

蓬庵公 孫枝

貞節卷之七

靜齋公 士堅

泳園公 士蕭

別峯公 士陞

惺庵公 虞初

三崧公 孔振

花龕公 興舉

山青公 維藩

汝茂公 之章

作舟公 士莊

姚氏先德傳卷之一  
行義

先一世祖勝三公本籍餘姚元季隨父官安慶始遷桐城  
為人敦厚正直喜解紛釋難鄉人爭鬪多不之官求公一  
言以決朴素自處待尊卑長幼一中於禮周貧恤匱無吝  
人稱長者年九十六疾作召戚友言訣諄諄戒子孫以孝  
友忠厚不及家事而終子孫守其遺訓至今且五百年間  
人不絕遂為江南望族

先二世祖文二公本名子華性孝友穎悟過人童時即務  
學寒暑無閒及長尤好施予周恤貧難鄉里德之交際取  
與一準於義家雖殷而布衣蔬食澹如也足跡不至官府  
每歲鄉飲寬衣博帶雍容尊俎之間望之翼然人莫敢怠

士林則之卒年七十五

先三世祖仲義公自少敦慎不事浮靡善詩賦謹言行以孝聞平居無疾言遽色鄉黨交遊必以和信尤懿達好施予人皆呼爲好善元末兵起依外祖蕭氏居每遇艱險處之夷然不見憂喜之色

先贈給諫公顯字宗顯仲義長子生而淳厚端謹及長制行剛方非禮不言不動與人交謙謙卑遜有非行者則弗與通待族人以恩顯困必扶鄉鄰有急必赴聞人善言必令諸子記而行之治家嚴肅鄉里法之有不平者取直于公以理剖決莫不悅服而去少年酗酒遙望見公則藏匿不敢出一語有夜盜公穀者被執或勸訟之公曰是迫于飢寒耳訟則不可爲人仁者不爲也遂釋之家素豐弟感人言求析產異居公不許曰兄弟天屬一氣奚忍分異乎弟堅求不已乃擇腴田善宅與之自取荒蕪鄉里義之以比古薛包子旭幼聰慧公常撫之曰此子異日必興吾宗後果貴如公言

瑩按公以宣德九年卒太子贊善少詹事涑水司馬恂作狀翰林學士嘉興呂原作墓誌銘吏部尙書南陽李賢作墓表尙寶少卿莆田柯潛作輓詩皆盛稱之今撮其畧敘述如右

景明公昶贈給諫第三子參政公旭弟爲人端厚簡默孝友出于天性處鄉黨一以謙遜自持和粹之容盎然與人交情誼周摯急于行義見人貧困盡力卹之而不自爲德時稱長者

松窩公場字惟選別號松窩山人參政公會孫性剛直愿朴務大體十五六卽自卓立躬耕家以不乏事父母以孝稱嫡母王氏嘗夜患瘧疾作榻震有聲公守之中夜仗劍履寢戶外斬之得朽木一株母疾遂愈平居麤衣惡食至禮節所關必竭力以副尤重喪祭濟困恤匱無吝色性喜飲飲輒浩歌每親朋銜盃相對怡然終日有自得之趣子起邑庠生孫若水萬曆辛丑進士刑科給事中終廣西布政使參政

栗岡公璧字廷實杏林公楫長子邑庠生爲人脫落不羈輕財貨重施予抑強扶弱人德之事父母孝常罄私財以益公費諸弟或求分析父母有所私愛公及弟廷獻公琛卽以田產讓之獨好圖書百家諸子及陰陽醫卜之說靡不殫究教授生徒甚盛親喪率諸弟子以孝慎一遵朱子家禮嘗作軒名曰味菜取咬得菜根之義也內雖恬淡而遇事敢爲族中事無巨細皆力任之立家規條約森嚴重修族譜旣卒人猶思之

先葵軒公希廉字崇賢參政公旭曾孫廷獻公琛長子少習舉業尤精六藝廷獻公蚤卒奉母孀居幼弟方禔禔次弟又卒僅遺一孤公子六人皆慧乃罷舉業經理田疇千里延師以教諸子見文學之士必與款洽竟談朝夕以廣弟姪及諸子見閭性善飲每遊覽必載酒酣賦詩操行忠厚有婢刈草侵鄰人界鄰人詈辱之婢歸以病死其父斃泣欲訟鄰人罪而要其贖以求公公曰婢實病死而故陷人以利其有豈無天乎不許鄰里聞之益多公戚黨或



貧不能存公屢振之莫起且鬻其子公益憫之爲贖還其宗且勸之力耕卒遂饒裕族諸生某嘗私憾于公以大徭役困之公憊甚作感懷詩貽諸子曰他日子孫必有興者當厚恤宗人也昔人手植三槐吾以詩誌之然公在諸子道者輒困及沒四子祖虞本虞賓虞自虞一歲同入郡縣庠孫之騏之蘭先後成進士仕爲名宦姚氏科名人物至今稱盛者皆公後也

南車公承虞字敬思葵軒長子父歿督諸弟力學甚嚴晝夜不怠或有倦者則策之曰麥飯之詩其敢忘諸蓋葵軒公感懷詩句也由是誦讀之聲與悲號之聲相聞聞者感歎服闋公郡試第一諸弟同時入郡邑庠公曰乃今可以慰吾父矣余豈沾沾此一衿哉遂輟業就耕徜徉山水以

終公性恬淡寡嗜慾尚氣節言笑不苟子弟見之無不肅容起敬妻吳孺人卒公年甫三十三遂不續娶撫子之騏卒爲湘潭名宦

養和公祖虞字孝思邑庠生孝友寬厚生平不與人忤負人倫鑒少年以文相質公決其終身所成就不爽兄南車公歿撫姪如己子嘗教授廬江邢氏甫數日生徒侍飲公忽泣下弟子問之公曰自余兄歿未嘗一日與孤姪離今館此念熒熒者無以成立也邢氏曰曷不從遊于此乎公曰余姪雖幼而性介以口腹累人不爲也邢氏謀使傳其幼子公樂之乃攜姪以往卽湘潭也

夢弧公之藺字汝夢似葵公少子萬曆乙卯舉人性方剛樂與人爲善內而宗族嫻亞外而友生鄉黨皆嚴憚之有

過輒恐公知邑中利弊關

國計民生者力陳于當事必興除乃已

崑源公之章字汝含葵軒公孫賓虞子也孝友嚴毅兄死撫雙孤教養成立與人交接未嘗不恭謹及有過必正色拒之無所依阿族中事無大小咸取平焉姻戚貴顯舉事有不當者造廬諒之公輒一言而決有暮夜入室竊資裝去者家人物色其人請訟之公不許曰此非素竊者財亡可復彼受盜名終身莫贖矣醉人經莊側溪漲泥污其履倚酒踵門而詬公閉戶若不聞明日其人謝過公曰是酒也非汝也仍具雞黍酌而勸之其人愧赧遂改行一時不檢者聞之皆斂迹晚歲卜居孔城鎮有會館朔望集父老子弟講求孝弟忠信之道且曰與諸君子言之期諸君子

行之若弗行則父兄之教不先子弟之率不謹矣鄉里感之多善行者崇禎丁丑流賊犯桐城公禦之遂卒于難幼子孫極年十三以身翼父激烈罵賊亦死之

仁山公孫枚字仁山少孤力學授讀養母性恬退與物無競歲旱鄰田侵其水遂以讓之爲族長公正有聲或相忿爭公片言輒平子文點歲貢生亦端介有父風

曉峯公文熒字玉青龍泉訓導孫森第三子也伯父孫林罵賊死無子以公嗣以明經考授州判居家養母不仕族黨貧乏常出粟周之東郭子來橋圮首倡重建行人賴之著有花岑集行世

蟄存公文樞字駕侯職方公第四子幼耽書史慷慨識大義職方宰東陽有坊者何德成獲罪當笞公奇其狀言于

職方得免且厚恤之金華山中白頭賊起東陽武生許都  
作亂陷城何固所親信也常左右之家人母弟以免于難  
職方夜走樓村糾義勇復城公在城中與學吏厲思盛健  
步屠亮計盟諸獄囚應之省中援師亦至賊破走阮馬謀  
陷職方獄甚急公走哭鳴冤

王師南下事解公乃奉職方隱小龍山著尙志書以見志  
時何德成已貴爲四川提督猶屬公書而致餽焉

順治己亥海寇擾江甯分數百騎至桐城公倡義募眾與  
邑令葉公堅守城以全公善詩畫工文章旣澹于榮利事  
職方家居几園林之樂悉心營之職方卒後益恣情出遊  
窮洞庭彭蠡衡嶽匡廬之勝度閩嶠探武夷往復西湖虎  
邱秦淮維揚者二十年所在以詩文自娛當事聞其賢爭

餽遺之輒以資貧者里中義舉尤多戚人張六吉以逋租  
繫獄公鬻產代贖免之故人子齊宏孤苦公衣食而教之  
卒以成立妻姪戴名世少穎悟公異之攜歸使與諸子共  
學自督課之後以文名當世康熙辛亥大饑公夢神人召  
試以詩金牌大書不度金錢度螻蟻寤曰此神召我賑濟  
也乃倡議請賑鬻田以創其始遠近爭輸設廠以食餓者  
朝夕有時後先有序男女有別日食數千人自二月至五  
月足不及家夜夢神人攜童子至曰以付汝翼日家人報  
生子矣遂名之粥郎疫癘大作人多野死公悉爲營殯瘞  
已未復大饑公夢前神人召試賑粥詩金牌限鈞萃二韻  
驚覺乃刊募米小偈遍張城市村鎮使粥郎捧簿沿門求  
募邑人鼓舞應之所活尤眾比年遂大熟先是中丞靳公

聞公賢將舉博學鴻詞公稱疾不就至是中丞徐公國相復以山林隱逸聞公固辭乃止所著雉巖集寶閒齋集同聲堂文集左傳疏解幻鐸諸書皆藏于家卒年五十一學者稱蟄存先生乾隆九年鄉人思公遺德以孝行上聞旌之入祀忠孝祠

東膠公士翼字東膠峽江令文焱長子性至孝母方孺人疾剗股和藥以進康熙庚午鄉試峽江公卒于京師公徒步迎喪哀動行路修宗譜篤族誼字其幼孤教其失學者族人賴之嘗客蘇州見鬻婦償官逋者括囊金代還邑郊外多無主枯棺買山瘞埋不下數百塚

荆啓公孔錚字振修端恪公孫羅田公長子負雋才年二十舉康熙庚午鄉試需次內閣中書幼失母擗踊中禮及長孺慕不衰每祭諱日或經塚所必涕洟竟日父在官暴病公家居心動卽日衝暑往省至一日而父歿士民嗟異之父負帑金千餘獨售己產償之不耗諸弟貲養後母纖悉稱其意端恪有妾張氏年少矢志無子公奉之如母病亟目將瞑兩穉子牽衣泣不顧母至輒開睫淚下被面死學使者以

聞特旌孝子

桃溪公孔欽字崇修端恪公長孫刑部郎中士暨子沈靜好學早補邑庠生坐監以能文知名閒歲一省視京師布衣策蹇至則閉戶讀書先達以是重之折行輩與交內行修謹樂善好施著有桃溪詩集

髯樵公孔嶽字岱雲作舟公第四子性孝友廉謹作舟歿

哀毀骨立事母張氏先意承志惟恐不懽家貧僑居河畔  
一夕山水暴至負母疾走宅後小洲屋旋漂沒走未及岸  
濁浪排空無生理仰天大慟忽狂風拔大木截其水勢得  
免乃棄儒爲醫術甚精應手無不效家以稍裕推解諸昆  
弟以孝友稱好誦大上感應篇以醫救人尤竭意貧者嘗  
暗捐葭劑申值數十金不令其人知其治病不主故方所  
創獲輒驗好施予修道路津梁設義漿糜粥置棺槨以殯  
無告廣義塚以掩骸骸不掠人美不伐己長書法尤端重  
一筆未嘗苟且年八十二無疾而逝

容齋公興宗字志暘桃溪公子貢生候選光祿寺典簿幼  
孤孝事其祖父母及母睦於族人仁慈好施予康熙己丑  
桐城大饑紳士賑粥太霞宮道觀公甫逾冠卽與其事經  
理三月餘所捐最多乙未奉檄賑饑公至邑西挂車河散  
給有法人得實惠又司平糶於大甯寺由夏及秋用力尤  
勤藥餌搗拊績絮茶湯之施無虛歲年甫三十而歿邑民  
仰之如鉅公者宿焉

恕齋公孔鉞字升初康熙己卯舉人內閣中書母老請歸  
侍養曲盡其歡鄉里稱孝友室無私財仲弟爲滄州知州  
逋負數千悉售己產償之居鄉方直遇公事敢言無諱人  
不敢以私干讀書天文樂律無不究心尤沈潛易學著有  
紀元大略一卷最爲精奧

荔香公馨字椒雷楚雄公元孫邑增生爲人廉正少孤貧  
爲武安知縣張公若霽贅壻以才幹見重族眾推之爲長  
數十年經理族事整肅公平每判曲直不過一二語人咸

姚氏先德傳卷之二  
服其當年近九十強健如壯男子見後輩子弟必和以莊  
及卒後族長數易皆不及既久人猶思之

先祖春樹府君諱斟元字儀匡薑塢公第五子邑增生孝  
友和厚能文章而不達薑塢公卒家事悉聽于諸兄日益  
貧落乃分諸逋負而析居先祖妣潛山徐氏盡出匱具償  
之猶不足遂客遊自給先是薑塢公博極羣書生平不肯  
著作有所攷論輒于書頭或片紙記之蓄書十萬餘卷朱  
墨殆徧歿後頗有散佚府君患之乃與諸兄就遺書抄撮  
散碎數千百條又手抄詩文欲編輯之未成而卒後數十  
年瑩得依據輯爲成書者賴有府君本也府君生平與人  
和易無疾言遽色而廉直不苟雖燕居倉卒未嘗有惰容  
以是人皆愛而敬之  
姚氏先德傳卷之一終

姚氏先德傳卷之二  
仕績上

先參政公諱旭字景暘號菊泉明景泰庚午舉人辛未進  
士授刑科給事中伉直敢言或以太銳規之謝曰近侍以  
言爲職苟知而不言則枉屈之咎在我天順丁丑上書訟  
于忠肅冤既忤權貴適御史某朝班坐給事中上公抗疏  
論之執政助御史遂以坐次爲罪謫鄭州判已而朝論皆  
是公議卒定坐次科居道上至鄭州講求民隱公恕廉平  
民悅服秩滿去州民挽留者數千人馬不能前有上疏請  
畱者公爲詩謝之而去憲宗登極擢南安知府盡心民事  
剗害興利尤以學校人材敦勵風俗爲先大成殿圯倡捐  
修之學宮有道源書院宋理宗御書碑刻尙存公重建作

石亭以覆之選諸生資質厚重者肄業其中親爲講授給膏火在治六年境無流亡人無逋賦每雨旱禱輒應比歲大豐成化二年產嘉禾士民歌頌之繪圖以爲瑞秩滿擢雲南布政使司右參政武暢蠻夷結土寇爲亂公行至關索嶺以聞敕公及三司會指揮進勦平之威惠大著成化六年庚寅萬壽節至京祝嘏畢乞骸骨歸屏處山中足跡不履城市丙午家居無疾一日命具酒家人會飲畢沐浴更衣而卒年七十八祀南安名宦及本邑鄉賢祠

瑩按公在南安郡人鄧璵字梅峯者作循良傳甚詳同時澱江太守蔣銘廣西按察司副使蔣誠新安張達皆爲之傳公卒後向里方君爲之行狀方名見字惟素瓊州守向之長子玉成副都之曾祖也今傳狀尙載舊譜中南安府志江南通志及府縣志皆有列傳又南安人作嘉禾圖詩至今猶存乃採錄於此與御史爭坐事則據惜抱先生新譜也

湘潭公之騏字汝調號渥源十世祖葵軒公次孫敬思公諱承虞子也與從弟先芳麓公先後八日生甫彌月葵軒以筐承二孫弄之一道士乞食葵軒飯之言貧不能治具道士笑曰一筐中盛二進士何憂貧乎忽不見公六歲而孤貧不能購書手寫讀之爲文清勁久困童子試不少貶曰遇合數也吾爲吾文而已年三十八始入邑庠明萬曆癸卯舉人丁未進士授湖廣湘潭知縣房師李湘洲先生湘潭人也公往辭曰之騏此去所以報師恩者當使吾師名重鄉里有長者譽至則李氏果有豪僕不法公庭笞之

曰吾爲爾主門人卽子弟也安有父兄遠宦而子弟縱其家人爲不法乎自是境內肅然公治事精核發摘如神一紳士造謁意有所干公與語移時其人逡巡而退卒不敢發洞庭多盜守令患之公請往捕或以非湘潭事不宜問公曰潭邑去湖不遠且潭人之所經也可異視耶吾越境往出盜不意必成擒矣率健卒飛擢直入賊巢果執其魁還誅之遠近以甯公性嚴肅而待人寬厚不爲己甚峻絕苞苴民爲謠曰只飲湘潭一口水不染長沙半點泥己酉鄉試分校闈中稱得人以廉能薦將入都疾卒年四十八兵備副使王志遠素不治聞公卒馳至縣署甚嚴密如將籍沒者及見公停止寢尙未含殮所衣臥具極寒儉兩幼子哀毀躑躅應對如成人詢喪事一無所備室中蕭然惟圖書與所著詩文汗漫率皆手抄四壁書潭之錢穀出人會計及當興革諸事封一木篋甚固啟之則疏邑中善士剏民冊也副使撫屍大慟曰咫尺有名賢而我不知冥冥之中負此良友姚公獨爲君子我顧何如哉士民間公歿父老子弟奔哭聲徹天副使哭而慰之曰父老哭何益姚君方未殮身長八尺安所得巨棺乎某鴻臚年七十餘扶杖入曰老人身長與賢侯等有自具棺在請以殮於是邑人爭致賄賂公妻項孺人僅受棺以內餘盡卻之副使以聞按撫羣公致賄千金孺人堅卻不受扶櫬歸日舟車送者絡繹數百里按撫遣吏護之至皖仍以所致賄金囑皖守貽書桐人爲遺孤置膏火而請祀之名宦祠桐人感之亦祀鄉賢祠



本朝康熙間公之孫文燮仕雲南值兵亂閒道歸

國行至湘潭父老詢之曰此前朝神君之孫也共庇之得脫

瑩接湘潭公仕績見湘潭縣志湖廣江南兩通志行

狀則公會孫士黌所撰今採諸文並舊新二譜敘錄

如右

先副使芳麓公諱之蘭字汝芳參政之來孫也祖蔡軒公希廉父似葵公自虞公幼而岐嶷英氣迥上十七爲邑諸生明萬曆戊子舉人辛丑進士始仕福建海澄令地濱海夷商通市太監守監其稅公至詢利病所在耆老言璫暴橫商民弗堪一日有數百舟環璫廨將爲不利數十老商懼爲累走訴公曰任眾譁勿動俟吾示出則已乃可免耳皆曰如約太監以舟迎公佯緩其行謂縣尉速備昇天百人今夕有所調發旣乘舟至太監迎甚恭曰何以救我公曰商怨深矣稅屬上供而小供十倍之禍之階也請爲君出示罷免太監曰善示出眾乃解散公謂太監曰海口去邑治遠倉卒不應儻令歸而眾復逞不任受咎也君能從我往乎太監曰善然上供在未可遽移公曰上供有額誰敢問之君當爲行李慮耳太監乃出輜重并舟至縣公又曰官舍卑隘垣可一躍踰也行李重得無誨盜曷運至郡乎太監曰善安所得昇者公立召百人至卽夕發太監曰行李往矣我畱奚爲亦發至郡則無以棲遂倍道還福州自是不復至惟檄取上供如額而已姦民周慶妄言呂宋產金富人張崑利之上書請採詔使往視撫按檄縣爲崑

具舟而不移文呂宋公曰是駭外國也且呂宋卽產金請  
貢猶當卻之柰何示貪於外夷乎屢請勿往不許乃使巨  
商舟載嶷慶戒縣倅偕往親視於海畔旣畢以銀鑄繫嶷  
嶷曰我皇商也何辱我公笑曰若得金歸乃皇商耳姑繫  
之次及慶曰兩臺檄中無我名公曰嶷倚汝若左右手利  
害共之又次及巨商商曰我何罪公曰二人不得金儻蹈  
海死何以報天子汝擁重貲必不肯死吾以二人付汝矣  
戒倅伺之勿令與夷私於是竣事還報卒無金上誅嶷慶  
壘書褒之未幾紅夷千人以七船載貨至漳乞市如東粵  
香山澳撫按令卻遣之守道以問郡縣皆茫然莫敢應公  
密白曰夷此行以某爲謀主某則某之壻也若得其婦翁  
夷可去守道檄郡縣捕某得者有賞公曰若是是速颺耳

內檄袖中密誠二幹卒以某翁至翁果致書其壻某得書  
大懼力謀之紅夷竟去澄邑九都田瘠苦旱鹵公濬渠三  
百餘丈通石馬淡潮以匯於澗築下埭以防鹹瀉淡糞石  
爲斗門以時啟閉九都遂成沃壤澄人名之曰姚浦澄有  
平禾莊田賦納於龍溪吏以隔屬欺之加其賦鎮海衛故  
隸漳浦而歲食澄粟千餘石里戶苦之公請使莊賦歸澄  
衛糧改折軍民稱便畱心學校捐官租以給諸生錄囚多  
所矜釋諸生涂一榛黃鳳彩以人命株訟將抵罪公察其  
枉皆爲平反且資卹之兩人旋皆登第漳浦姦民以私仇  
誣告叛逆竄紳士姓名甚眾浦令悉錮之囹圄急報按撫  
守道檄公勘之至則逐一訊釋破械鎖者數百人獨二人  
家藏刀杖申解而告之曰汝無死法然臺疏已上未敢以

空文銷案吾已爲汝白自赴省臺辨之可不死二人如公  
言獄得罷大計舉循良第一丁父憂歸老幼焚香泣而送  
者數千人羣商走境外贖金卻之羣商固請取一縑而行  
曰此亦一錢之意也除服補博野令數月行取南京禮部  
祠祭司主事擢精膳司郎中尋守杭州會城酬應煩而訟  
獄多公一皆親讞剖決明恕十郡之民皆願求質於杭司  
理某少年進士公傾心接之訓誨如子弟某大恚布蜚語  
於要人中以事調守福建汀州政尙簡要愾大溫和期年  
大治時有邊警朝議加餉催科旁午公曰汀州僻處山陬  
田僅一萬四千餘頃終歲勤動輸常後時何堪額外議加  
搜府庫餘積得五千金以佐新餉民不病而完如額汀人  
大喜過望督餉使者特疏薦之部議當遷官公念母年八  
十請終養詔褒許之且曰無有如汀守之急公愛民者加  
按察司副使以榮其歸季父翠亭公與公齒相若長相懽  
也翠亭歿公爲兩弟置產蕩之再公輒復而予之祖居有  
聽玉館蔡軒公構以教子公增葺之聚族子貧者延塾師  
教讀族有諸生向以征徭困蔡軒公者公旣貴仍禮事之  
且厚其子族人老且愧曰少年爲人所容老年爲人所容  
吾顏厚矣公遇事敢言鄉里有大利害作書啓當事常累  
千言無一語及私辛酉入覲京師杭司理亦以行取至或  
謂之曰不憂清華但姚太守一揭而事敗矣司理急謁公  
長跼謝罪公曰吾向以寅好故初無介介君何疑耶更揚  
其善司理由是得刑垣人咸服公長者天啟甲子無疾而  
卒年六十三邑人思之請祀鄉賢祠海澄汀州杭州皆以

名宦祀之杭之吳山西湖澄之東門九都民間皆有專祠至今猶存

瑩按先副使仕績見福建江南兩通志及杭州汀州安慶三府志海澄桐城兩縣志明翰林檢討海澄高克正碑文南京吏部侍郎漳州蔣孟育贈序其行狀則先職方所撰謹採錄如右嘉慶戊辰丙子瑩再過杭州謁公像於吳山及西湖廟猶完整己卯爲龍溪令將之臺灣至海澄謁祭公祠於東門內及九都紳士耆老至者百餘人言邑中祀公甚虔水旱禱輒應自明季公子尙寶寺丞孫渠爲漳南道

本朝乾隆開六世孫福建巡撫蔡再至祠祭今瑩又至邑人甚喜願畱十日俾眾咸得見之瑩爲畱二日雨地人各治酒數十筵盛會士女老幼先後至者絡繹於途盡歡而去時澄令張君際熙見之大爲感歎然後知公之德澤入人深遠也道光壬午瑩丁醒庵府君憂自海外還至廈門澄人猶與龍溪平和兩邑人士紛紛來弔嗚呼益可感矣

尙寶公孫渠字心甫號石嶺副使第三子明萬曆戊午舉人天啟壬戌進士授浙江龍游令地多竹樹浙省大工歲常採買稅且重民商咸苦之公力請停罷輕其稅邑人祠祀之再補福建晉江令瀕海水漲爲鹹潦所淤不能田饑民流離公捐募糶穀濟之全活數萬庚午爲福建同考尋擢江西道監察御史章奏數上皆中時弊錦衣項震乘醉殺妻公巡城立訊服辜執政私震忌之左遷上林院典簿

久之乃改南京吏部驗封司主事歷大名道僉事浙江水利道參議遷福建漳南道故相林鶴灘有遺產爲勢豪占奪林妻子孱弱莫能訴公檄府縣清還之復爲勢家所申左遷再起湖廣荆南道按察司副使終尙寶寺丞公視一官澹如而爲德於鄉甚力辛巳壬午之間桐城數被兵又苦蝗疫公歸自楚中捐貲助餉登埤捍守撫戢鄉里里人賴之順治乙酉卒年五十一祀鄉賢祠

瑩按漳州府人物志林鈺字實甫龍溪人崇正九年正月東閣大學士六月卒上以鈺誠慤不立門戶特加眷顧首輔忌之困以事遂得疾而終謚文穆此言故相林鶴灘卽其人也

先職方公諱孫棐字純甫號戊生副使第四子七歲能文十歲能詩中天啓丁卯副榜部試得州判棄之歸里崇禎癸酉舉應天鄉試甲戌流寇犯桐一時洵懼邑令楊公爾銘星夜請兵省委參將潘可大至公率親友輸餉助之賊圍城攻四十晝夜公風雪登埤衣不解帶置火器擊賊得不陷庚辰試禮部第授浙江蘭谿令素困南米自邑運至南都凡三易船十金而致一石公請於按撫具題改折田籍歲久紊亂豪民胥吏因緣爲姦良民畝益重公清覈隱匿數千自是無敢飛寄者壬午分校鄉試有私干者公謝之曰我曾旣白戰安敢負青天言者赧然而退蘭人感之建祠澱水驛之左後爲叛兵所毀復建於大雲山祝壽寺與蜀中劉公合祀癸未調東陽縣有許都者邑巨室子豪富陰蓄死士謀亂僞爲中宮牌劄通行金華處州募義勇

公見文移疑之約鄰邑爲備甫議城守都已反劫宣平縣  
庫義烏失守乘勝攻東陽故無兵械人心洶洶皆無固志  
十二月初六夜本營把總斬關迎之城遂陷公使主簿宋  
琦奔杭請師自走樓村山中糾集義士趙鳴皋等數千人  
圖恢復時城中有獄囚三十六人素感公恩脫械不散公  
子文鼈陰與結甲申元旦公率義勇鼓噪至城內諸囚及  
民人應之殺賊甚眾主簿亦偕遊擊陸超以兵至遂復城  
敘功擢兵部職方司主事賊再來攻皆擊卻之都窮蹙乃  
詣紹興司李陳公子龍請撫都素豪富爲大言廣結交文  
士多喜之陳公欲救巡按左公光先惡其陷城斬之並其  
黨三十餘人宏光南渡馬阮與左有隙使人以彈章示公  
曰左光先殺降有罪能證之將增秩否則禍及公曰左公  
君子也甯同坐死不能負心馬阮怒誣公激變左殺降逮  
下廷尉

王師南下事解乃歸龍眠山中葺茅屋居之性好遊或經  
年不歸旣又築頌嘉草堂與諸子飲酒賦詩門以内雍雍  
如也康熙癸卯卒年六十六著有亦園詩集十卷己酉里  
人思公德與守城功請祀鄉賢祠蘭溪東陽亦祀之名宦  
瑩按公仕績始末見蘭溪東陽兩縣志及浙江江南  
通志公性樂山水歸山年未五十自號樗道人嘗作  
樗傳曰王荆公之敘芝閣以爲天子不尙祥瑞神奇  
之產銷藏於蒿藜榛莽之間而山農野老不復知其  
爲瑞也樗則異是大者擁腫而不中繩尺小者拳曲  
而不中規矩立之塗匠者不顧樗之爲樗久矣樗七

歲知文十歲學詩三十餘年而成仕五年而廢性好  
名山水身所涉歷輒裴回不忍去嘗飲泉州洛陽橋  
上五更潮至聲如千軍萬騎海日初升注射雪濤中  
片片作金光如龍鱗乘醉狂叫欲躍身赴之同輩力  
持其袂乃止謁武夷卜三僊宮值祈雨甫應捧視山  
峴色白潤微香道士云由秦及今數千年物也進舟  
九曲溪兩岸山光應接不暇捨之登接筍峯峭立摩  
空俯臨幽壑貫木於壁懸三梯長百五十丈緣以登  
後人見前人履前人不取盼後人髻梯盡石崖益突  
兀橫綴鐵索下鑿小坎僅容半趾握索踏坎寸進之  
數百武始得拾級達天遊閣武夷絕頂也六六峯三  
三水獻秀爭奇赤霞蒼靄可招人懷袖閒洵奇觀也  
他如鄧尉梅花婺源靈洞無日不在夢寐間然性不  
急少容忍有逆於心必衝於口過輒忘之胸無宿怒  
以是容於人焉

階州公文熊字望侯尚寶寺丞孫榘子邑庠生順治庚子  
舉人丁未進士時方承平有司急催科

廷試策問錢穀公舉直省分合數以對且陳轉移之法讀  
卷詫曰書生顧安得此以第一卷呈秀水曹公溶見之曰  
自歐陽公後不復見此矣然語多直恐不得上卷果置二  
甲授浙江江山知縣調蕭山耿逆亂聞浙歲用師民間遭  
寇亂後歲比不登蕭山大邑芻糧供具尤多又遠道水陸  
輸運費與糧等民困不支往往後期公力請按撫出貲折  
價代民交納嗣是蕭山皆折價以爲常康熙乙卯文武鄉

試同考擢陝西階州知州州亂後凋敝悉除無名之徵上官督催之急公縛其吏之驕橫者撻而遣之以是降調歸先是蕭山蝗起公移文於神忽大風雨蝗盡死又有逸盜自行歸獄曰夢父責之不可累好官其神化如此既卒桐人祀之鄉賢蕭人祀之名宦復與賈公國楨合祠以祀蕭有水旱蝗疫禱輒靈應久而益著道光七年蕭邑紳士以公與賈公禦災捍患臚列治績及歿後靈應事實呈請封號浙撫劉公以聞下禮部議請如典例奉

旨特封賈昭應伯公昭感伯

楚雄公文烈字覲侯又字岷懷職方長子邑增生順治戊子副榜辛卯順天舉人相國溧陽陳公亟賞其文曰此先正大家可以啟衰式靡也丁母憂家居課徒畱心里中利

弊先是桐城糧畝以區分催糧納官解郡者十區而僉一人曰區頭胥隸操縱魚肉之擇人而食僉斯役者家立破公與端恪公條其弊於當事徵解歸官而民不與積弊以除時方丈量與縣令酌定則例高下平準邑人稱便初授漢陽司李鋤豪強理冤抑獄訟鉤鉅必得其情明允之聲大著省有疑案悉以委之民人吳安爲盜誣服擬決及秋審公疑之數鞫諸盜不能辯始白其誣而出之漢口魚鹽之衝鹽引額重滯銷爲商病公立法疏通議政以清會某者負徐商鹽千引不償而病度不能起自經死姦人羣教其子以訟公理其獄大創之刁訟斂迹湖南方用兵荆襄禁旅大集芻蕘供億挽輸旁午又諸郡水災飢民赴漢口覓食者襁負接踵公曰民力竭矣乃繪圖上撫按捐俸勸



如... 卷之二  
輸設粥廠以拯流民全活萬計奉檄委運草軍前盡革陋規民得稍蘇吏事之眼日進諸生講論經史研究理學嘗曰讀書當出爲名臣處爲真儒勿徒事經生業也俸滿遷辰州判尋擢雲南楚雄府知府滇地新附伏莽未靖公單騎入其渠帥營說下之康熙癸卯丁外艱歸哀慟致疾卒年五十

先端恪公諱文然字若侯號龍懷職方第三子生而穎異寡言笑九歲著德風論有煦嫗天下之志明崇禎壬午應科試作凶年饑歲文督學金公蘭奇之曰此一幅流民圖也拔第一是歲舉應天鄉試癸未成進士選庶常而歸本朝順治三年安撫李猶龍薦授國史院庶吉士改禮科給事中四年戊子主山東鄉試六年疏請

嚴救撫按恪遵

恩詔清理刑獄勿任有司稽遲或條赦之外可矜宥者許專疏上陳又請選用會試下第舉人以廣任使又言直隸與山東河北接壤兩省各有疆限盜賊竊發難越境追捕請改保定巡撫爲總督統轄山東及河南懷慶彰德衛輝三府疏參各省督撫濫委私人署州縣官皆部議行轉工科給事中八年

世祖章皇帝親攬萬幾求直言大臣以巡按澄清無效議停止公上言

朝廷設官內外分理惟巡按一官所以疏通內外察吏安民爲任甚重今不得其人都察院大臣不聞指參甄別反使

朝廷察吏安民之大典坐格於二三澄清罔效之匪人徇私溺職莫此爲甚願

賜召對面議同異疏入憲臣及御史甄別有差臺班一清是年江浙水災西北大熟公言東南財賦之區災傷之後隱憂方大漕米宜令改折以災之重輕定改折多寡又言折漕規則新立小民不能周知吏因緣爲姦或改折外重徵火耗或先已徵米又收折價或重折輕解弊端不一請敕漕臣密奏嚴劾

上亟採納之十年兵部滿漢大臣有罪鎖禁城門公上言唐太宗時錄囚至刺史鄭善果太宗曰善果官至五品雖有罪豈得與諸囚伍伏念諸臣皆列大僚素叨豢養今寒天凍夜冷鎖三重積成疾患恐不死於

國憲而死於天災非所以廣

皇仁也通衢大路萬目觀瞻功臣貴臣免冠帶鎖愧辱難堪非所以存

國體也

上是公言遂除其令及後康熙十年廷鞫總督周有德編修陳志紀逮繫總督麻勒吉復疏申論之

上命以後官員犯罪鎖拏鎖禁永行停止轉兵科給事中尋乞終養歸康熙五年起補吏科給事中遷戶部六年疏言川湖諸省官吏藉採木爲名搜取民間屋材墓樹宜申節嚴禁又言採買官物由官發價者駁減之銀應扣存司庫若價出自民餘銀宜仍還之民間又言一部可結之事卽宜一部徑結一疏可結之事卽宜一疏通結若各省錢

糧考成已報完者部臣宜於議覆時卽予開復以省奏牘而免冗滯又言蠲免錢糧有流抵次年者科臣請填入次年由單已奉

旨行矣臣查各直省送到由單竟未有開載此一項者以蠲免在頒發由單後也惟於流抵下年由單之首載明應蠲分數與抵免銀數則吏不敢匿民沾實惠又請停本色駁減以杜私派裁蘆稅差官以汰冗員停減開鑄以疏通錢法全撥十分兵餉以恤士卒更正兩淮鹽課考成免直隸諸府狐皮折解均如所請行海內稱便九年八月

特旨內陞正四品食俸仍畱給事中任先是臺垣內陞例皆回籍候補有需次數年者內陞畱任自公始也十年五月擢副都御史十一月遷刑部侍郎十二年癸丑充會試

總裁轉兵部督捕侍郎京口副都統張所養奏將軍柯永綦徇私縱恣公奉

命往鞫得實永綦罷十二月遷左都御史十三年請建皇儲疏畱中不報時

仁孝皇后梓宮奉安鞏華城盛暑

車駕屢幸公請節哀勞以養

聖躬且引唐太宗作層觀臺望昭陵因魏徵諷諫泣而毀觀爲言語甚切至長沙新降復叛公上言長沙距辰沅不遠當擒獻賊使之際必請兵救援彼見荊州武昌頓兵不渡謬謂國家棄此土於度外一旦賊使再至望絕而降非得已也宜深原其故以開反正之路又疏言耿精忠與孫延齡俱受吳三桂指麾復與延齡爲唇齒中間所阻隔者

廣東耳耿逆將士舊駐其地熟悉山川地利恐出不意表裏夾攻則廣東勢危江西毘連閩粵若賊侵踞贛州南安則餉道中絕宜進駐重兵以通聲援

上皆嘉納十二月陝西提督王輔臣叛河南巡撫佟鳳彩乞休公言河南密邇陝西恐流言煽惑鳳彩任巡撫數載民所悅服宜令力疾視事

上命畱任河南十四年正月時議裁兵裕餉公言兵有新增久設若一時議裁恐聚而生變宜於新增者分其緩急次第裁減後再議舊兵以漸裁之乃可秦中已定獨平涼未下公言大局既定我兵從此合注湖南自有餘裕請停調蒙古關東兵免卑溼生病又言鞏昌蘭州旣下宜堅招撫明大信以徠平涼皆洞切機要十五年擢刑部尙書公

爲人剛直而仁恕前後在諫垣十餘年遇天下大計疏凡數十上罔所忌諱性恬淡雖貴如寒素而志在康濟視民不安若痛切其身故自誦曰常覺胸中生意滿須知世上苦人多聞者動容及長秋官益自發攄清滯囚理冤獄推上恩全活甚眾以爲刃殺人於一時有限例殺人於萬世無窮推明律意虛心參酌去其甚者漸劑寬平其後部中皆稱姚律十七年六月卒年五十九

賜祭葬如禮諡端恪雍正八年入祀賢良祠

特敕加祭一壇建專祠於本邑有司歲時致祀始公之乞歸也奉職方里居近十年杜門謝客當事諸公不一干以私至關地方利害必移書反覆得請乃已如南米魚課諸役充者往往破家公請立官收官解之法夙弊以除縣中

奉檄丈量公與邑令鄔公謀依萬厯碑文田分九則賦分三等賦不虧而畝無虛羨邑人稱平所著疏稟八卷文集十卷詩集十二卷白雲語錄六卷雜著十二卷并行於世居病日記一冊存家

澄按先端恪功德在人其大者具載

國史今據文集奏疏及魏敏果公撰神道碑文吾鄉潘蜀藻先生撰墓誌銘徐健庵韓慕廬兩先生總序參諸魯齋公所撰行述備載於此公爲諸生卽厚自刻苦貴後終身布帷素蔬獨汲汲於惇睦任恤之義每年計祿入之餘分爲恆敦時慈四目其姍友中孤嫠無依者月有常給曰恆其計口徧致閒一舉行者曰敦以備婚嫁卒葬不時之需者曰時以周鄉黨鄰里及僕從之無告者曰慈歲數百金以爲常京師沙高門內有育嬰堂乃柴道人世盛抱養棄孩地也費苦不給公捐俸廣募經紀之每月八日偕諸公爲育嬰會雖積冗雨雪無閒職方避地海上時與韓公有舊韓歿後遺逋三千金公代償之無難色故南鄭令高君世豪爲公戊子山東所得士高病故任內未完追賠銀數千家產盡絕妻子應入官已就道矣公首捐數百金代輸一時諸公聞之欣然樂助遂得免松江司李陳公子龍故後家在中州落甚公訪其子陳撰厚恤之故溧陽相國陳公子易成尙陽堡公歲時周給將卒前月猶浼陳少宰一炳致二百金且曰爲語溧陽公子吾老矣恐後不能繼也登

朝三十餘年每遇

廷議侃侃直陳而中懷坦白滿漢諸公以此咸推重之  
訓子弟唯以讀書安命爲本嘗曰士子中式正如男  
婚女嫁耳婚嫁之後而歌偕老詠斯男幸矣其不幸  
而爲中葑之傷綠衣之怨者豈少哉汝曹勿以遇不  
遇爲欣戚也次子士堂會試與五河錢君世熹俱爲  
儲太史振所薦以額滿應退一四總裁以次覆較及  
王少司寇清遂定取一卷榜發則錢君也少司寇爲  
公山東所得士撤闈來謁知所退爲公子慚謝公笑  
曰遇合命也君主試而余兒不售且已售於分較矣  
見乙於君此天以彰我兩人無私也君報我厚矣病  
中

朝命待講學士張公視疾公疏謝倦倦猶以講學勤政  
早奏蕩平爲言

上爲動容公壯歲卽好學道潛心克治存養之功乞病  
數年每日記所言行得失以自考驗於一念之微不  
自寬假嘗燕暇諸子在側有言某喜用術意欲人皆  
入其機殼中書公士堂曰甯可入機殼之中而成人  
事不可出機殼之中而敗人事君子明知小人之我  
欺而甘爲所欺明知小人之用我而甘爲所用知者  
其智甘者其仁公喜曰敬佩爾金石之言父子閒受  
善如此晚歲洞然死生之理手書囑諸子曰余生平  
不耐哭人死後可知汝等體是意哭以成禮而已毋  
多哭又曰憂人之憂樂我之樂又曰人之生也萬殊

其死也萬殊如吾者而死樂矣公以六月二十四日卒於京師前一夕里中有大星如火自北而南隕於居宅鄰人驚爲火災亟趨拯救至則無有翼日延術士禱之而不知爲公應也伏讀

詔賜祭葬碑文有云履重任而彌處以小心持大體而不遺乎細故二語可以盡公生平矣

德安公文燕字翼侯號小山聯方第五子也幼讀書目數行下年十九舉順治辛卯舉人辛丑進士端恪於諸弟中最愛之凡兵農水利戶口錢糧之事悉與講求故曉然於民生利病授江西德安縣令地素瘠亂後凋瘵愈甚公悉心撫字勸農興學清丈量均田畝究枉屈抑豪橫歲饑倡捐勸賑設粥廠以食飢民署中脫粟不飽常晏如也康熙

甲寅舉江西循良第一

詔賜蟒服行取將受代三藩亂起南康兵潰賊壓蒲塘渡口直趨南關去城十里城中兵僅四廿人居民奔散公謂把總魏久功曰此吾兩人立名節地也然賊未過河猶可以智勝俟力竭後死未晚撤東西北三門兵盡登南城鳴銅盤代鉦裂帛代旗東蘆薪數百炬使兵民齊呼爲號火光中呼聲動地賊疑援兵至驚退未十日尼將軍自湖口來將至瑞昌公率兵民迎大軍夾攻遂大破賊德安人感之建祠於城南耆老過之有對像隕涕者乙卯至京師例用御史以端恪爲總憲嫌改主事未受職而卒年四十五先是職方里居公偕諸兄侍養且十年孝謹備至姊適方於宣早寡依父兄居以哭職方病篤公手疏城隍願減

已算以益姊年哭且拜里人遇之感泣及卒端恪哭之曰  
吾弟忠孝智勇人也天靳以年不展其用吾老矣一慟致  
疾後公兩月而沒公無子以兄子士墳嗣所著有春草園  
詩文集

峽江公文焱字彥昭號磐青湘潭公之孫也父孫森號珠  
樹爲龍泉訓導善文詞兼習兵事流賊攻桐佐縣令守禦  
得全鄉人德之公生十二歲作金陵感懷詩時稱神童十  
四入泮學使金公特試以詩立就人傳誦之與從兄端恪  
外兄方公亨咸輩以詩名爲潛園十五子順治壬寅歲貢  
廷試第一康熙己酉舉順天鄉試授長洲教諭辛酉甲子  
再聘浙江同考課士衡文惟以不欺爲本學使主試咸敬  
禮之吳中大饑公監粥廠精核胥役步置井然男女有別

又監藥局徧延名醫全活甚眾任滿去士民泣送數十里  
遷峽江令銳意興革利弊舊例徵糧里長以督花戶城中  
復設保戶以督里長鄉民輸稅咸主其家歲斂費數千公  
出示永革郡守聞之遂令合郡遵行峽人勒石誌之公居  
心仁恕以寬簡爲政不事鞭朴而民感服以憂歸服闋入  
都疾卒著有楚游草超玉軒詩集

開化公文燮字經三號夔湖珠樹次子順治甲午舉人十  
六年己亥進士授福建建甯府推官建甯居閩上游山嶺  
崇峻盜賊多據爲患民俗獷悍睚眦讎殺案積無數公片  
言立剖未數月囹圄爲空有方祕者殺方飛熊前官已定  
讞矣公疑而鞠之飛熊故爲盜嘗殺祕一家旣就撫祕乃  
乘閒復讎公請於直指活祕督撫以爲明允疑獄悉委決



之有武弁被殺案繫千餘人公僅坐數人罪餘盡釋去督撫駭曰此叛案何遽輕率公曰職所據者地方初報之文與盜供也蓋鄉民持械逐盜弁適過從騎未至爲盜所殺地方初報盜營中執爲民叛殺弁遂以反叛申審公檢皮閣得初報文固在時盜案亦破獲訊供自伏殺弁故得其情他所平反多此類耿繼茂建藩其下怙勢不法多貸民錢因奪其妻女公悉使訐發而自捐俸金并募同官代償還之民間妻女歸者百數藩戚嚴某尤橫或訟之郡郡守懦反爲所侮公請治其事執法加等自是藩人斂跡時閩臺初闢檄公督丈量事建郡民皆依山鑿田不可施繩弓公授諸吏勾股法按舊冊計田之廣狹爲增減民不擾而政舉邊海戰船歲久壞欲新之費鉅時議按戶口出錢民間鼎沸公密言於上籌款代之民乃安秩滿將遷會裁推官缺康熙八年改知直隸雄縣先是七年渾河泛溢城東南隅皆水樓櫓傾圯田廬漂沒公至修城築隄造橋以利涉者人名曰姚公橋渾河有龍爲暴倣韓昌黎祭鱷魚故事檄之水果退其歲大熟邑歲貢狐皮民苦累公條十三難以上得題請免之地近京畿膏腴多爲旗人圈佔民不敢爭公爲爭之旗人請於戶部司官至牽繩量地繩所定處民不得有公拔佩刀斷繩司官見公剛直不屈詞少遜未幾有詔令退地還民雄俗好鬥微鬻爭角輒投繯赴水因以攘奪其財或不欲死家人且促之一月之中死者十百公乃示令死者鄉約卽予埋葬毋得生事遂無死者又立屯丁爲團長以守望盜賊不敢入境他如報墾地蠲耗

如城先德傳 卷之二  
三  
羨減鹽引恤驛政清逃人撫循瘡痍善政尤多以捕逃功  
擢雲南開化府同知尋攝曲靖府阿迷州吳三桂叛公陷  
賊中密與建義將軍林興珠有約林發之早爲賦所覺繫  
之獄乘間遁還安親王軍林先以公謀告王王遂  
上聞

聖祖召至京賜對甚詳滇平遂乞養歸避居龍眠山中顏  
其堂曰樂耕未幾母喪哀毀卒年六十六公神骨清秀目  
光四射幼卽知詩十歲能文章自爲諸生文益博麗一時  
文社名士皆推之家雖貧食客滿座所著羹湖詩選泳園  
詩集黃柏山房古文李昌谷詩註龍眠詩傳史論四六偶  
存芝山春草錄薤麓吟雄山草滇行草武夷遊草十餘種  
又梓定方密之通雅方羽南易盪皆行於世修纂之書則

建甯府志雄縣志曲靖府志凡三種開化舊無志自公創  
之又嘗修滇省通志甫脫稿而寇亂遂佚尤工畫倣大癡  
雲林及黃鶴山人梅花道人皆逼肖片縑尺幅人爭寶之  
卒祀雄縣名宦祠

瑩按公詩文畫幅及所刊諸書海內時有存者其仕  
績已入 國史大清一統志吾鄉張文端太傅所撰  
公傳尤詳今據志傳及舊譜敘錄如右

渝川公士重字勃少號松譚職方第三孫丹楓公文勳長  
子少好學十五入邑庠康熙壬子拔貢選授甯國府學訓  
導或惜之公曰擊柝抱關必克盡職以視立人之本朝而  
道不行者可以無恥也旣就職講學課士敦行勵節倡建  
培風閣以爲養士肄業之所歲饑設廠賑粥存活無數邑

如... 卷之二  
三  
令某嘗餽公金以助施予公鄙其人卻之移渝川縣丞署  
高安縣時當編審前明編地二百九十二里地狹而賦役  
重亂後凋殘益甚公爲破圖均里不徇一私卻饋遺禦強  
侮殫心更定一百五十四里康熙二十八年遂以新冊開  
徵士民感頌勒石旣徵漕耗米有餘盡蠲給貧民舉卓異  
擢渝川令以漕務不忍苛民部議降一級士民羣謀申訟  
於部公卻之而歸養親以終

刑部公士暨字注若號魯齋端恪長子貢生候選睢甯教  
諭教育寒士建置祭器修列女祠歷遷國子監學正順天  
府通判改刑部貴州司員外轉本司郎中端恪講求刑律  
多所更定公親承其事故精律例論決平允大司寇佛公  
倫張公玉書亟稱其才他司疑案必令公覆閱而後奏之

康熙 年河南有大獄

上命擇賢員可使勘者咸以公對召見

上曰此故尙書姚文然子耶宜可使也果得其情以報在  
部數年以疾乞歸居鄉力善行義饑歲設粥勸賑者再親  
黨施予不可勝數歿祀鄉賢祠著有茲園詩集二十四卷

姚氏先德傳卷之三  
仕績下

先羅田公諱士基字履若號松崖端恪第四子幼而沈靜  
踰冠舉康熙壬子舉人時端恪已卒輦下諸公咸推重之  
公獨閉戶闔修不好浮譽尤熟資治通鑑有志世務授湖  
廣羅田縣令革除陋規公費之害民者撫民務以愷悌不  
輕笞辱地患盜公立保甲法牌長自相逐捕盜賊以宵催  
科賦役不責胥役惟以牌示俾民自催之卒無逋欠遷建  
學宮以重文教立專祠以祀忠烈置義塚以收暴骨設官  
後以渡行人力行實政督撫異之將行取而卒羅民哭之  
哀焚香泣送至於境外建祠粟子四歲以公卒之日羣祭  
之稱姚公會踰年又請祀之名宦祠所著清聚山房詩集

八卷行於世

朝邑公士塾字庠若號松茂端恪第五子廩貢生初爲碭山教諭地僻俗陋修葺學宮勸建義塾集生徒講學其中士風一變康熙二十七年總督傅公巡撫洪公交章薦其賢

命賜冠服擢陝西朝邑令風節自厲下車首革陋規千金當編審期又有例費數千悉裁之奉鹽仰食河東給引徵稅不以商販歲由河東鹽運使發引於諸州縣民間按戶授引卽食不能盡一引者亦有常課而大族豪強反多食私鹽夤緣巧脫官有餘引常勒增於單丁無力之家公爲計口受鹽之法自是豪右無所隱匿官民兩便之朝邑方域東盡黃河古岸舊距蒲州門僅里許後河去古岸而西

徙數十里朝人渡河耕蒲人伺熟輒刈之比召眾渡援已束載而去歲輒爭鬥不休各治挺刃火器以爲侵守每秋殺傷數十百人大獄數興秦晉自兩中丞以下各袒其部民文移排擊以庇之自明嘉靖至是遂成風俗死者不可勝計然終莫能曲蒲人也公力請於兩中丞檄蒲守及諸監司會勘是時兩邑聚者萬人洶洶爭論各官未及言公抗聲曰秦晉民俗健鬥而官使氣激之殺戮近百年矣仁者不忍爲也諸公今者能和衷以謀善後乎眾少定公乃徐言曰蒲人爭界於河以曲朝邑死不恤設河身再西越朝邑縣治而去將縣治亦蒲有之乎賦若干責辦朝邑而蒲人坐收無賦之利以此言之曲在蒲諸公咸曰姚令言是蒲守與其民色沮乃從公所畫界浚濠植柵以識之朝

邑好博公患之犯者輒予杖又大署賭博字於版中其門而橫設之家人率俯躬出入族黨相戒曰飢饉男子何爲狗竇中行也恥弗與通傳徒自是絕迹辛未秦中饑公捐俸倡率紳士設粥廠於邑之四鎮日必徧涉每出乘馬中道行令吏兩行搜灌莽中遺嬰募乳婦以養殍死者市棺埋之流民鬻妻者贖之壬申復大饑經營如故戶部尚書王公齋帑金賑秦至朝邑歎曰令誠循吏亦孝子也使州縣畢若是

朝廷何西顧憂乎踰年以痺病告歸乙亥九月十二日

上御便殿曰姚文然好官其子姚士塾亦好官冢宰熊公司馬索公宗伯張公皆對如

旨

上曰大阿哥癸酉祭西嶽回曾以姚士塾奏朕近安在張公對曰患病回籍矣

上歎惜久之臥病四年而卒年四十八公初請告時

詔有招流民百戶歸者授縣令公力疾爲兩孤姪經紀之如例各得官而諸子弗及也歸後秦中人士先後數千里走問不絕

雅州公銳字藻如號退存內閣中書士堂公長子端恪冢孫也有幹才仕鄞縣令均旗丁徭役民便之大嵩衛饑盡心賑卹存活甚眾再令蜀之梓潼巡撫年公奇其才治獄嚴盜諸大案必委之或召以自隨事輒理假攝府州者再旣授雅州知州清商稅卹郵遞蜀中增新熟田賦雖小邑不免惟雅州以公力持舊額卒於署州人慟之卒後囊不

遺一錢弟孔鏞知合州經紀之得歸  
合州公孔鏞字祝如號西疇雅州公弟康熙中以貢生選  
授河南羅山縣令羅患盜公夜出微巡即所劫處飛騎逐  
之中道悉縛羣盜聞之大懼遂息歲旱徒跣禱祈仰天號  
泣輒得雨歲饑賑粥日夜經營督視百餘日民以惠存者  
萬計丁憂歸再補湖廣保康縣擢四川合州知州歷署牧  
令者六七所至裁陋規除苛政兄銳卒於雅州公負逾萬  
中丞年公以公攝其事鈞稽補劄再歲而清俸滿中丞恐  
其遷去預疏請以升銜畱任備緩急用已得  
旨報可而卒所仕士民奔哭者數月不絕著西疇集五卷  
先是公嘗以孝行

上聞欽旌孝子及卒乃祀之忠孝祠以子淮貴贈中憲大

夫浙江杭州府知府

處州公鈴字卿如號梓嵐朝邑公子由附貢生知貴州湄  
潭縣苗民雜處素稱難治公開誠化導不事鞭朴治多山  
艱於溉田公教以竹製水車穿山架壑源流數十里民便  
之畱心學校暇輒集諸生講論經義以卓異薦擢京府通  
判遷戶部郎中外用浙江紹興府知府督治堤工寒暑靡  
閒捕盜緝梟豪姦斂跡吏民咸畏憚之調處州府治事益  
勤卒於官身後惟書數卷敝衣一笥而已著有葭齋詩集  
十卷

贛州公孔鉅字道冲號歸園父士鬻七歲工詩太傅張文  
端亟賞之二十八郡庠屢試不中雍正五年冬  
詔中外舉品行才猷可備任使者即親戚子弟不避潼關

道方公正瑗舉公明年三月引

見圓明園用者三十四人公發廣東以知縣試用初署恩平縣撫流寓清獄訟姦吏畏之皆相引去十一月風聞匪民將劫庫爲亂且有期公佯不問密修備具城西有村曰土瓜萌探有賊蹤親攜壯士往破獲之得賊渠李梅及黨與十數人誅之餘釋勿論省中聞警急發兵至則已定矣調番禺杜絕苞苴晝夜治事某公所任耳目吏私有所干公立子杖而白其事或危之公曰某公明察讜必不入既而果然邑有八命之獄歷五令三守不能決督府鄂公知公才親提至署囑公訊之凡三晝夜果得其情而讞定遷保昌護府篆地產毒草蔓延山澤閭民俗輕生多死者公自爲文齋禱於神越日天大雷雨雹竟夜毒草皆自萎死

田禾無恙踰年有騰爲災公如前法禱之立應有以公賢能密聞者

特旨陞廣州理徭同知宣揚德化勸耕桑徭人悅服軍民翕然擢知韶州府有煤山聽民開採額稅外歲有羨餘公請招商盡以羨額歸上粵中議開銅礦自惠韶二郡始公親歷山谷取沙入鑪驗之計其工本得不足償且慮粵民易聚難散致爲亂階上議寢其事得

旨罷二郡便之翁源縣民控媳殺其子以子方力田腹痛死牙齦脰閒有中毒狀竈下得斷腸草謂子餌之死必有姦謀草存縣庫公檢而訊之僉指通姦者婦表兄也公察其婦駭而貌寢問其夫餌草故不諱問姦事則呼冤公疑焉指毒草詰之婦曰此扁豆葉也取豆葉較之疑似未定



如... 卷之三  
五  
詰婦之母母泣語其女曰長官仁厚胡弗言婦慚欲言且止恐之始曰是日以豆葉作糜粥待夫與叔不至婦暫就寢及叔食粥去夫覓婦於寢容止不戒卽趨田遇暴雨遂疾公曰是矣陰症固有類中毒者語其父不信公曰毒草尙在雖枯猶能殺人否僉曰能又曰餌草後毒發何時僉曰不移時乃以草與婦踴躍食之自午至暮無恙其父乃惶恐請罪攜婦號痛而歸其虛心鞠獄類此以母老乞歸未幾母卒乾隆丙寅服闋起知贛州府

上御勤政殿召見諭曰以汝忠厚誠實肯任事故特用汝汝知治民之道乎愛百姓而不可姑息敬上司而不可逢迎公頓首受

命至贛前守方被劾待理有欲案外文致者公力爲辨雪得免洩屬邑必減隨從省飲食躬行田野與農民相慰勞重修郡城文廟及濂溪書院條列學規延名儒主講戊辰郡米驟貴贛令出示減價牙僧遂閉糴會有言無業貧民恐藉爲亂者人情洶懼鎮道議發兵鎮之公曰是激民也恐有它故力止之示諭各邑民閒米價悉聽諸民惟官米減價不數日鄰郡米船銜尾而至一日三減其值七日而價平再以病乞歸晚歲家居尤以任卹鄉鄰爲急遇災則首倡捐粟以濟貧民又議永惠倉貯穀備荒歉平糶與同里薦紳合力成之自是倉恆有積穀者由公募賑之餘首建此策也乾隆丁丑卒年六十七

葭州公孔鎭字翰擢號次耕開化公文燮之孫右贊善士藹次子初仕直隸永平知縣以卓異擢知滄州地濱海初

設旗兵駐防兵民多構衅平情聽訟一無所袒多方化導  
人情帖服

聖祖軫念河工頻年南閱道經滄州公供應七次儲備無  
缺事集民安以父憂去起服補陝西葭州知州時軍興旁  
午送運至西藏嘗失道沙漠中行五日夜迷不知所嚮雲  
際隱隱見幡幢遙望之而趨遂達大營人皆驚異康熙丁  
酉大軍凱旋乃回任議敘軍功一等蔭一孫入監讀書以  
積勞致疾卒性耿介所至有聲卒之日無餘資殯幾不得  
歸祀滄州名宦祠

曹州公興瀆字南召號介石葭州子也初官滎陽縣丞以  
才能署尉氏縣嚴行保甲姦宄遠遁雍正六年應  
詔舉品行才猷可備任使者授山西太平知縣有史村舊

河淤塞力勸士民濬治漑田無算

上聞嘉之賜還百姓蔬濬錢調臨汾兼攝洪洞縣西藏用  
兵往來絡繹民間惶懼公親行周邑諭安之邑產騾採買  
之檄月數下胥吏爲姦公使民自登堂議值朝夕貨易如  
常人以是騾爭赴之價益賤而民不擾乾隆元年擢隰州  
知州仍

賜衣一襲八月擢知山東武定府創建書院振興文教漭  
州有王四夏天增者以殺人論抵公疑其誣州牧堅執之  
乃自訊察其情得誣服狀亟走白上官請釋之不可密訪  
真凶獲之四與天增者乃雪又督捕陽信巨盜八人合郡  
宴然里門夜啟巡撫異之令總理泰安四郡盜案調知曹  
州府郡鄰河單濮時嬰水患相度疏濬賑卹災黎民歌頌

之七年兼攝兗州沛有巨盜姚黑聚黨踞微山湖側官軍  
莫敢往捕公出不意親入其巢擒之餘黨悉散十二年  
車駕東巡顧問稱之次年坐所屬審案遲延謫戍軍台公  
好讀史喜談經濟從父軍營數年往返運餉兼餉官駝與  
奴隸同甘苦每執鞭牽駝呈驗游牧進退如廁養游牧皆  
稱其能而不知爲州官子也一日宿水所水綠色毒不可  
飲眾渴甚相顧愕然公啓笥出藥投之曰吾辦此久矣在  
軍台雖苦役輒吟詠自樂著基城集

辰沅公興潔字香南開化同知文燮曾孫祖士堞雲南南  
甯知州父孔金江蘇泰州同知公幼穎悟長身鶴立目有  
異光長而好學鄉試五薦不中慨然去之吳楚間所至有  
聲譽乾隆六十年湖南苗作亂公單騎從軍經略福公與

語奇之以理問銜檄至鳳凰廳勸贊同知傅公勳軍務廳  
駐鎮箠鎮爲辰沅要地公甫入苗兵突至爲傅公謀畫登  
埤捍禦動中機宜圍解調隨大營馬足所經形勢瞭如指  
掌將軍以下多所咨訪大功告捷授浦市通判擢知茶陵  
州楚中沃壤也公以苗酋雖擒兩頭洋及諸寨猶負固不  
下自請隨營督撫壯之陞調鳳凰廳同知益銳意擊賊每  
督弁兵所嚮有功遂破兩頭洋大寨上崗寨苗僞請撫公  
奮然往受傅公時爲辰沅道知其詐追止之不可及寨大  
雨苗人所伏火器皆溼倉猝中散公直進搜擒其酋而歸  
寨遂下嘉慶九年秋餘苗悉平公陳善後策首言屯田與  
傅公參論其利條奏之委公經理屯事邊境大安十三年  
傅公由辰沅道簡臬司公遂以知府銜擢署辰沅道講武

務農感惠並著苗漢兵民莫不感畏之公涉歷苗疆幾二十年深習兵事謀議與傅公輒合以是相得苗事遂相與終始十六年實授

特旨嘉之謂與傅鼐後先濟美時論以為榮二十四年入覲將行疾卒苗民懷之哀動山谷裹糧赴省者數千頂香羅跪撫署求建公祠撫軍以

聞許之傅公時亦先歿乃為祠并祀之曰傅姚二公祠黃沁公仲字春溪辰沉兄也初仕山東汶上縣袁口關官轉原武縣主簿調鉅野擢河南睢州判公從事河工十餘

年情形既悉又性勤敏每漫口指陳要工洞協事理晝夜防築無不辦河帥以為有治民才咨署盧氏尉氏鞏縣諸縣皆有政聲教匪起大軍征誦旁午公應備軍儲供頓無

缺民閒若不知有兵者委赴羅山縣防邊又至湖北界老河口防江偵邏周密民以無恐在郟縣日鄰邑教匪日至

公團練鄉勇籌供軍需四境安堵所治李家集毗連魯山寶豐二界公方至集練勇巡防有姬家莊匪民煽惑將乘

閒為亂公會營掩捕平之雖汎黃流暴漲河帥急檄公回任屢竣要工歷署山東德州同知擢濟甯泉河通判調河南懷慶府黃沁通判總河李公以缺緊要

奏改同知以公升任遂終焉杭嘉湖公淮字思尹號書巢知合州孔鏞子雍正元年揀選授雲南河西知縣舊有街稅市物買賣者歲以為常徵

公首革之且勒石示禁民間額賦不知科則官不給印票村頭攬其事完一派十公刊給易知單然後民知定額慮

畸零虧折令納分票或錢民便之邑東南北三境食琅井  
鹽獨西路例食黑井鹽路遠而價昂或通融買食卽指爲  
私鹽閭閻苦之公請大府議改鹽法河西民咸歌曰河之  
西食鹽苦誰救之民父母蒙自懸舊礦廠運錫至剝隘歲  
用民牛費數千邑苦無牛民病之公激切上言免其役礦  
廠稅缺公奉檄監稅始至商進陋規公卻之問歲費若何  
商曰例約五千公歎曰此稅之所以缺也盡革除之礦稅  
足額溢二千焉商爲之頌曰清官管廠與眾懸殊礦旺稅  
足合浦還珠臨安府屬徵糧俱解折色獨河西本色累費  
且倍公力陳偏枯之困改爲各屬輪運積困以蘇前令交  
代有民欠借穀七百餘石多疲困不可徵公集眾戶悉焚  
其券眾皆泣下新興州東山土呂施國良佔民墳地陰疊

假塚於民墓興訟州官令民遷葬民越境訴公破塚勘驗  
得其假狀治國良以法海金寺僧與巧憑顯要勢淫凶不  
法民患其害歷任容隱公廉偵之僧方置鄰女於膝公怒  
執至痛杖而流之雍正四年保舉擢雅州知州西藏初平  
差徭馬咸取於民派累不已又按賦額科取夫價銀爲各  
屬補苴虧空公悉免之州糧額最重而兩川民田多隱匿  
會清查力請於上得如兩川例減輕於是賦增而民不困  
打箭鑪土司堅參達結死妻喇章無子妾天天有子囊珠  
革木初二人當襲職喇章背議欲立其弟小金川子兩婦  
爭印將構兵公馳往宣示威德卒定囊珠建昌土司作亂  
峨嵋令運糧調夫不應誤期檄公代運誤糧之員當斬公  
度大兵已出而糧夫未集斷難克期乃出己資備牛酒馳

如以... 卷之三  
至營中厚犒兵士皆感激各裹十日糧先行糧夫後至輓  
運濟之大糧遂備公仍歸功峨嵋令得免死督撫異之雍正  
七年雅州改府遂擢重慶府同知專理苗務盡革土司  
承應陋規酉陽土司冉光烜當襲循例餽金公卻而舉之  
邑梅酉陽兩土司之民爭界酉陽土司誣邑梅民楊應龍  
十七人謀叛淹禁十餘年不決瘳斃七人公雪其枉苗人  
感服八年署嘉定州民人歲額運米二千石至雅州立法  
變通費省而民稱便州與犍爲縣鹽井大牙相錯民人爭  
報稅多重科公履勘豁免者千餘井調署夔州府督撫交  
章薦擢浙江嘉興府乾隆二年調杭州乾隆七年擢杭嘉  
湖道病卒

中丞公蔡字香苜號鐵松先職方元孫父時以母病徒步  
百里外禱神請代母愈而身病遂卒公尙襁褓家貧甚母  
方夫人苦操撫之稍長不能從師口授章句公體母意拾  
薪而讀一夕虎至蹲牖下氣咻咻然祝之乃去乾隆庚午  
舉順天鄉試辛巳會試二甲進士授甘肅靖遠縣歲旱請  
賑措施秩然民沾實惠興修文廟義學教民置水車灌田  
開金石峴以通行旅立興靖堡集以便民貨調皋蘭縣平  
反疑獄署固原州獲巨盜馬得鼈及其黨擢守安陸民好  
巫習符咒之術收其徒眾嚴治之邪風一變移武昌豪猾  
斂跡督府吳公達善奉

旨偕公之貴州讞武甯州虧帑獄一時普安桐梓丹江諸  
縣營大案迭起株牽輒數十百人公晝夜推鞫清理無辜  
眾皆允服古州黨堆寨姦苗聚眾爲亂倉卒調兵公以三

百人馳搗賊寨平之回武昌吳公治江湖羣盜甚嚴獲者立置諸法公虛衷詳鞠無枉者改施南府再改漳州民好械鬥死則買人抵罪治之緩則玩法急則拒捕公曰民不遠門必先定期及其未鬥而剖曲直可消患於事前既買人抵罪則猶知畏法果使買凶者無倖免亦可懲創於事後乃定以賞罰檄諸邑行之門風爲衰漳州案牘甲於全閩苦積壓公檄諸屬邑每公牘註承行吏名及到縣發房送案發行日期無可推諉由是官吏振作塵牘皆清中丞德公保請調公福州

上曰漳州一郡濱臨海疆民俗刁悍最爲難治其緊要數倍於福州朕素知姚棻能事特從湖北調任因地擇人豈可輕於更調不許辛丑擢汀漳龍道甲辰擢廣東按察使署藩篆粵東山海交錯產穀不敷民食海濱居民往往於海中漲出沙地墾種名曰沙坦先是乾隆三十七年奉旨飭各督撫瀕水地面不得與水爭利官吏僉謂瀕水地禁墾海中沙坦亦在禁例自禁後小民視爲官荒益生覬覦偷種搶割案牘日繁公曰例應禁者謂阻水道塞水口諸沙地耳不禁則與水爭利而水且爲民害今沙坦皆在汪洋中不近海口與江河沙洲迥別與其禁之而陽奉陰違不如開之而給求養欲檄守令詳勘地形得沙坦千餘頃申文督撫奏請得

旨允行粵民便之己酉遷江西布政使明年擢江西巡撫高宗純皇帝八旬萬壽至京祝嘏數

召見從容諭曰所以命汝爲江西巡撫以汝母老俾得近地迎養耳豐城爲章貢下游眾水匯注先有石堤四百丈餘皆土堤時有衝害民田苦之公奏

聞增建石堤五十丈建昌界連閩省私鹽充斥犯法者眾上命公與總督長公麟鹽政全公德會議公議曰建昌無官設鹽店水販認領行銷故多收賣私販宜先設引店又江閩接壤兩省人民多處一村者東鄰食賤西鄰食貴錯處旣難區分匪類往往藉端勒詐小民甚不便宜定建昌鹽價與閩省同如此則店設而民無食遠之慮價減而民無食貴之虞矣奏上行之旋丁憂歸甲寅起廣西巡撫乙卯調貴州再調雲南黔省軍興福公奉旨留公駐貴州籌備軍需糧餉緩急得宜

上諭嘉之復調撫福建漳泉海盜害稼制府魁公請發帑金於上游五府買米十萬運貯漳泉以備春糶

上以米數過多福州諸府恐食貴命公與魁公籌度或於臺灣及江浙運米以濟公曰臺灣糧價未平已苦商運之多豈堪加以官買定議上游五府實貯倉穀存二碾一可得米三萬產米州縣分買亦可三萬江西春前有停運閩米尙貯水次盡運又可五萬浙江臺灣海運皆有濡滯沈溺之虞請罷之閩海居民捕魚爲生無賴者藉以通盜公嚴查灣甲獲匪民王安等五十餘人抵罪盜風斂戢閩中吏治久疲公檢院司積案三千有奇嚴督道府訊治之甫五月而結者十之六以病乞休辛酉卒於家年七十六著鐵松隨筆二卷蒙求草二卷別音正譌焚餘草各一卷讀



易管窺官轍檢存各二卷居官要語訓子錄一卷公性至孝幼時母方夫人督之嚴及貴猶不假顏色或施杖公怡然受之無所迂爲本邑士子置鄉會試資田以給路費至今寒士賴之其他置墓田建支祠修族譜周族戚尤多義舉

孟縣公肇修字蓬觀號自直雅州公長孫父興沅郡廩生公幼卽能文入大興縣學生乾隆庚午舉人壬申會試後搜取遺卷選授昌黎縣教諭丙子改歸原籍丙戌大批發河南補光山知縣植良鋤惡摘伏如神飛蝗入境虔禱於神步行赤日中督民捕治不旬日而盡禾竟無損甲午入闈同考再補汲縣大兵徵金川往來旁午公理臺站糗糧芻茭車馬無缺而民情安堵如不知兵歲饑捐賑較他邑

獨加三月民咸德之彰德衛輝懷慶三府麥不收奉

旨借籽種公盡心撫恤民雖屢歉之後無一逃亡及攘奪者衛河漫溢確查災戶賑濟胥吏不侵戶口無漏調孟縣去士民焚香遮道直至境外孟縣倉儲麥石每歲春借秋收向用板斗出入高下其手公改用制斛悉除舊弊士民感之爲立碑以誌未幾病歸

南甯公義輪字丹海先薑塢公次子乾隆癸酉舉人初任山西曲沃知縣調洪洞縣推陞鑾儀衛經歷終廣西南甯府同知署知府事公性簡重爲政一以仁恕所至有聲道府倚重之操守尤廉靜在曲沃日有兄弟分產者欲于公私餽萬金公卻之其人疑少更以黃金六百進公曰我爲吏而清白不能信於人愧莫甚矣豈較多寡哉且兄弟天

偷盍以餽官者讓骨肉可得友愛名而訟亦平矣其人慚而退

姚氏先德傳卷之四  
儒術

克齋公希顏字崇孔年十一善屬文補邑庠生邑令器之爲代聘于繆氏父歿有兄四人弟一人皆未娶公曰豈以余有室而忘諸乃自授徒束脩所入盡以謀兄弟之婚既皆婚而析箸公諫之不可悉讓宅產獨與繆氏奉母僦居公謂繆曰吾任授讀若任紡績合力以養母其庶幾乎然吾常出外不能朝夕惟若勉之繆曰唯乃已食糠粃而奉姑粢已旬一蔬而日進姑肉母年八十安養以終公治經精研傳註多所發明與同里方公學漸倡講學之會教授弟子甚眾皆稱克齋先生歲饑采蘋而食晚乃治薄田督耕其中新穀初升悉聽子弟之索公寡言笑終日不見喜

怒所學以躬行自得爲主或招之出妓侑酒公不飲而臥  
乃保妓納室中公斲如雷妓遂巡牀側而出壻方大鎮天  
啟中爲大名府推官公送女之任衣白布單方欲易以帛  
不可居三日去方挽之公曰士君子不得志則蓬蘽而行  
得志則行其道此則吾蓬蘽之行也國有道不變塞焉爾  
其圖之且爾爲刑官所關民命天地之和今畱二言曰哀  
矜求審克服念歷旬時方敬受教卒爲名宦

先似葵公自虞字智思葵軒公仲子也少任學問卽晰精  
入微葵軒公嘗以大徭役爲族諸生所困鬻產延師以教  
諸子隆慶元年耿莊簡公試士公爲冠兄弟四人同時入  
郡邑庠而葵軒已歿相與酌酒哭父之墓已召族人苦徭  
役者曰吾四人例當復役以復吾族成先君子之志因益

涉獵經史百家之言而以大易爲本貫穴精通學者曰眾  
嘗館某家有所見一旦辭去主人望之迨後代者敗乃服  
公長者公生徒旣眾察貧乏者嘗資之月以束脩助諸兄  
弟季貧甚置產輒廢又置如初癸巳以明經入貢丁母憂  
未赴丁酉入對詔賜博士冠服不受而歸日與故舊昆弟  
講授唱酬爲樂子之蘭萬歷辛丑進士公訓之曰士重始  
進宜有超世之識拔俗之操無以科名榮利誇詡也不平  
其稱不滿其量不易其樂不改其度是爲有道及除海澄  
令又貽二語使銘座右曰廉曰慈且曰菘蕪之釜魚壽春  
之畱犢浚儀之齋馬中牟之馴雉蒲亭之化梟茂陵之無  
蝗皆邑令事也孺子勛哉海澄嘗校士而公書至左右避  
之海澄笑曰吾父無私語發讀則言官中事不患不明不

如見先存作 卷六 二  
斷患其太過默念爲生民布德次第末減而已眾乃歎服  
公以孝弟百行之本服膺踐實擴而充之至于宗族鄉黨  
無閒歲饑疫里人以田操書致來反而振之晚歲好爲詩  
古文所著白石山吟牆壁語助澄心子雜說凡數十卷尤  
善星家言多奇驗將卒前三月取扇履諸物爲詩分寄知  
交曰吾以某日長別矣果如其言京山李方伯維楨爲公  
墓志曰昔宋李衡臨歿沐浴冠櫛翛然而逝周必大聞之  
曰惟釋氏達生死衡不學佛而能然殆孔子所謂聞道者  
歟余觀宋儒理學大明若俞汝尚劉義叟陸九淵蔡元定  
魏了翁甄龍友之類皆與衡同知生死吾道故有之矣奚  
事釋哉姚君預知逝期幾于道矣非日者所及也  
澤亭公士蕃字耕莘邑廩生性淳樸長記誦家世業春秋

江南稱專門公沈潛紬繹諸家傳說外多所發明里居講  
授生徒日進著有春秋指南三十卷嘗誡諸子曰循理安  
命節用讀書八字箴可終身佩也蓋自道其踐履云

先薑塢公範字南青端恪曾孫也祖羅田公士基爲名宦  
已有傳父贈朝議公孔銜邑增生蚤卒母太僕卿懷富任  
公弈壘女守節撫公及弟淑公性純孝敦敏好學博聞彊  
記及冠與同里葉花南西王中涵洛劉海峯大櫬方芻川  
澤諸先生友善約十年不下樓爲舉世不好之文故沈潛  
經史幽邃古澹邈然得古人不傳之意雍正己酉拔貢生  
乾隆丙辰舉順天鄉試第二壬戌進士廷試已置一甲第  
三人張文和當國以姻戚避嫌請改二甲然公于文和甚  
疎固未嘗干謁也選庶常旋授編修充三禮館纂修甲子

順天鄉試同考是時桐城張氏文盛中外要職相望公獨以學行自高無所依附以是不遷天台齊息園山陰胡稚威常熟邵叔仁和杭堇浦皆以鴻博著稱尤重公謂姚君之學不可涯涘窺也錢塘袁子才蚤歲入翰林名盛一時假歸諸名士咸以詩文贈送袁欲得公一言竟不可袁後作懷人詩及公云平生著書千萬言臨別贈我無一語蓋憾之也公在翰林不十年致仕歸往來天津揚州主講晚歲家居不出嘗以爲文章關于世運學術繫乎風俗人心元明以來士大夫崇尚義理氣節羣以宋儒爲依歸風趨正矣其敝也師心臆說人以程朱陸王自負非失之拘墟則漸于恣肆一二好古之士沈潛廣博專意名物訓詁功力勤矣其敝也逐末忘本日以著述求名反置倫常日用爲輕身心性命不復知爲何物二者交譏亦未有以相勝故生平爲學攷證與義理兼進博極羣書自經史百家天文地理小學訓詁以逮二氏之說無不淹通明貫而踐履醅粹一以程朱爲宗律已甚嚴雖盛暑室中未嘗一日不冠帶與人和易不爲峻絕人見之自無敢怠者有所問難必澈始末告之僻書奧典不事披尋舉誦如流蓄書十餘萬卷皆手自論訂考正譌謬後學得其說者研尋鑽仰皆足以自致古人顧不肯著書或問之笑而不答學者尊之稱薑塢先生年七十卒猶子鷟傳其學以經說詩古文名于世後四十年曾孫瑩乃掇拾遺書輯之爲援鶉堂詩集六卷文集七卷經史子集筆記四十六卷後又增葺重修爲五十卷行世道光十年入祀鄉賢祠

惜抱公鼐字姬傳先贈朝議公第六孫乾隆庚午舉人癸未進士選庶常改兵部主事尋補禮部儀制司主事戊子爲山東副考官還擢員外郎庚寅再爲湖南副考官辛卯恩科會試同考改擢刑部廣東司郎中四庫館啟選一時翰林宿學爲纂修官諸城劉文正公大興朱竹君學士咸薦公以所守官入司金壇于文襄公雅重公欲一出其門竟不往書竣文正公以御史薦已記名矣未授而文正公薨公乃決意去遂乞養歸乾隆三十九年也先是館局之啟由大興朱竹君學士見翰林院貯永樂大典中多古書爲世所未見告之于文襄奏請開局重修旣而奉旨搜求天下藏書畢出于是纂修者競尙新奇厭薄宋元

以來儒者以爲空疏掊擊訕笑之不遺餘力公往復辨論諸公雖無以難而莫能從也將歸大興翁覃溪學士作敘送之且乞言公曰諸君皆欲讀人未見之書某則願讀人所常見書耳梁階平相國屬所親語公曰若出吾當特薦公婉辭之集中所爲復張君書也公以爲

國家方盛時書籍之富遠軼前代而先儒洛閩以來義理之學尤爲維持世道人心之大不可誣也顧學不博不可以述古言無文不足以行遠世之孤生徒抱俗儒講說舉漢唐以來傳註屏棄不觀斯固可厭陋而矯之者乃專以考訂訓詁制度爲實學於身心性命之說則斥爲空疏無據其文章之士又喜逞才氣放蕩禮法以講學爲迂拙是皆不免于偏蔽思所以正之則必破門戶敦實踐倡明道義維持雅正乃著九經說以通義理考訂之郵撰古文辭

類纂以盡古今文體之則選五七言詩以明振雅祛邪之  
旨嘉定錢獻之以考證名尤精小學公贈序曰孔子沒而  
大道微漢儒承秦滅學之後始立專門各抱一經師弟傳  
受儕偶怨怒嫉妬不相通曉其於聖人之道猶築牆垣而  
塞門巷也久之通儒漸出貫穿羣經左右證明擇其長說  
及其蔽也雜之以讖緯亂之以怪僻猥碎世又譏之蓋魏  
晉之間空虛之談興以清言爲高以章句爲塵垢放誕頽  
壞迄亡天下然世或愛其說辭不忍廢也自是南北乖分  
學術異尚五百餘年唐一天下兼採南北之長定爲義疏  
明示統貫而所取或是或非未有折衷宋之時真儒乃得  
聖人之旨羣經略有定說元明守之著爲功令當明佚君  
亂政屢作士大夫維持綱紀明守節義使明久而後亡其

宋儒論學之效哉且夫天地之運久則必變是故夏尚忠  
商尚質周尚文學者之變也有大儒操其本而齊其蔽則  
所尚也賢于其故否則不及其故自漢以來皆然矣明末  
至今日學者頗厭功令所載爲習聞又惡陋儒不考古而  
蔽于近於是專求古人名物制度訓詁書數以博爲量以  
闕隙攻難爲功其甚者欲盡舍程朱而宗漢之士枝之獵  
而去其根細之蒐而遺其鉅夫甯非傲歟又與魯賓之論  
文曰易曰吉人之辭寡夫內充而後發者其言理得而情  
當理得而情當千萬言不可廢猶之其寡矣氣充而靜者  
其聲闕而不蕩志章以檢者其色耀而不浮遠而通者義  
理也雜以辨者典章名物凡天地之所有也閎閎乎聚之  
于錙銖夷憚以善虛志若嬰兒之柔若雞伏卵其專于一

內候其節而時發焉夫天地之間莫非文也故文之至者通於造化之自然然而驟以幾乎合之則愈離今足下爲學之要在於涵養而已聲華榮利之事曾不得以紆乎其而寬以期乎歲月之久其必有以異乎今而達乎占也旣還江南遂東朱公孝純爲兩淮運使延公主講梅花書院久之總督書公延主鍾山書院自是揚州則梅花徽州則紫陽安慶則敬敷主講席者四十年所至士爭受業或越千里從學四方賢雋過先生所在必求見焉錢塘袁子才詞章盛一時晚居江甯公數與往還子才好毀宋儒公與之書曰儒者生程朱之後得程朱而明孔孟之旨程朱猶吾父師也然程朱言或有失吾豈必曲從之哉程朱亦豈不欲後人爲論而正之哉正之可也正之而詆毀之訕

笑之是詆毀父師也且其人生平不能爲程朱之所行而其意乃欲與程朱爭名安得不爲天之所惡乎公貌清而癯神采秀越風儀閒遠與人言終日不忤而不可以鄙私干自少及耄未嘗廢學雖宴處常靜坐終日無惰容有來問則竭意告之喜導人善汲引如恐不及以是人皆樂就而悅服雖學術異趣者亦忘爭焉南康謝蘊山方伯語人曰姚先生如醴泉芝草使人見之塵俗都盡青浦王蘭泉侍郎集海內人詩至公曰姬傳藹然孝弟踐履醇篤有儒者氣象禮恭親王薨遺教必得姚某爲家傳德化陳東浦方伯未卒前一歲屬公曰某死必得先生文以誌吾墓新城魯絜非以文章名江右始學于閩中朱梅崖先生于當世文少所推許獨心折先生以爲不及乃渡江就訪使諸



甥受業其爲世推重如此嘉慶十一年復主鍾山書院十

五年鄉試與陽湖趙甌北兵備重赴鹿鳴宴

詔加四品銜公年八十矣神明如五六十時行不撰杖兵  
備年亦八十二觀者以爲盛公在江甯久喜登攝山嘗有  
卜居意未決二十年七月卒于鍾山書院年八十五門人  
共治其喪生平所修四庫書目廬州府志江甯府志六安  
州志官書別刻外自著九經說十九卷三傳補註三卷老  
子章義一卷莊子章義十卷惜抱軒文集十六卷文後集  
十二卷詩集十卷法帖題跋一卷筆記十卷書錄四卷古  
文辭類纂四十八卷五七言今體詩鈔十六卷門人鏤版  
行世道光十年入祀鄉賢祠公主講數十年所從受學門  
弟子知名甚眾其尤著者上元管同宣城梅曾亮同邑方  
東樹劉開而前工部侍郎歙縣鮑桂星今禮部左侍郎新  
城陳用光安徽巡撫鄧廷楨最爲顯達至私淑稱弟子者  
則宜興吳德旋華亭姚椿寶山毛嶽生同邑張聰咸皆以  
文學著述稱名其會試所得士則左都御史涪州周輿岱  
通政使昆明錢澧檢討曲阜孔廣森最著

姚氏先德傳卷之四終

姚氏先德傳卷之五

文藝

丹楓公文勳字集侯職方次子端恪之兄也少儻負氣  
節能文章與兄文烈及端恪有江北三姚之目順治辛卯  
拔貢以親老不仕爲園亭日供遊讌以娛親意撫孤姪士  
璽士至及孤甥方曾祐皆成立啟家塾課族人子弟多以  
文藝名晚歲逍遙林壑神采飄然年八十二卒祀鄉賢祠  
靜齋公士堅字庭若端恪第三子少聰穎讀書日數行下  
能詩賦古文年十二作漢景帝論同里王大初見之驚爲  
良史才端恪亦器之勛以詩曰相期讀史惟今日莫浪談  
詩在少年公益專精史學作歷代帝王世系攷歷代年表  
每侍端恪問史事原委井然九遂心明史網羅野乘最多

歷遊秦晉燕趙楚豫之地時從田叟老卒詢明末軼事考定敘斷詳慎有體時人方之孫甫唐書性孝友端直好急人難被服寒素與人交謙不自勝少時立邪淫戒作不可不論四卷勸世游金陵友人召飲及門聞名妓在日僭律隔壁聞釵鈿聲爲破戒可共盃酒乎遂不入邑西挂車河爲川廣楚滇孔道萬山奔流百里交會行者至中橋常若漂沒康熙甲寅乙卯閒逆藩作亂羽書相望冒險渡河死者十七八公慨然急造小舟濟之隨募建石梁以永其利歲禮捐設粥廠病施藥寒給絮不能嫁娶殮葬者皆力助之以爲常美髯善飲盡數斗不亂每談古今人物成敗山川奇勝聽者忘倦精九章算法六壬書占多奇中公早負大志未克用以明經貢于鄉未五十而卒邑人請于學

使具題入祀鄉賢祠公晚好邵康節爲人顏所居曰邵窩所著邵窩詩文集八卷明史彙未成散軼

敬齋公士堂字佩若端恪次子丰儀俊逸文章贍麗康熙己酉舉人內閣中書每撰

制敕閣下環觀歎絕入武功館纂修方略有裁制總裁舉以爲式從

車駕狩口外途次以小臣屢蒙顧問有紀行詩一卷爲人孝弟子良無疾言遠色而介節嶷然不肯以門望干進四試禮部房薦者再竟不第卒祀鄉賢祠著有雲怡閣文園卷詩八卷

泳園公士蕭字綏仲開化公次子少工詩文張文端謂其深醇和雅有劉子政曾子固遺風居母喪哀毀骨立飯食

不入干口舉康熙戊辰進士授編修父老乞養終喪乃赴  
入直

內廷試常稱

旨以爲姚士藹品行忠厚文學甚優

御賜書籍甚多數主湖廣直隸鄉試所拔多知名士終左  
贊善爲人篤實謙沖敦本睦族鄉人頌之著有瞻雲草南  
歸草餘齋詩集泳園文集行世

玉璿公士在字玉璿階州公長子七歲失母哀毀如成人  
隨父官蕭山縣多逋累階州去任公獨留浙三年經營補  
苴督撫知之咸稱其能尤工詩古文辭客遊京師王公爭  
致數奇不遇士林惜之

別峯公士陞字玉階階州次子九歲工詩兼多材藝年十

四隨宦浙東中秋遊船簫鼓相近偶一弄箏四舟寂然與  
兄士至入京師詩文傾倒一時有二難之日康熙癸酉舉  
順天鄉試卒年三十六人惜之所著空明閣詩集傳于世  
湘門公士封字玉筍階州三子邑庠生幼爲張文端所器  
以女字之及長遍涉經史工詩文所歷秦豫聞浙唱和之  
作一時名士咸好之戊子鄉試主司奇其文已定前列榜  
發日以違式見落主司歎惜久之弟士陸邑庠生亦工詩  
文客京師日公卿倒屣多思善疾蚤卒

惺庵公虞初字姚墟作舟次子也幼承父訓退然自下研  
究羣書博考傳註訓詁名物制度尤于宋五子書折衷有  
得著書十餘卷發揮理趣學者稱之曰惺庵先生爲文理  
宗濂洛氣襲歐曾晚歲詩境清幽尤能以古淡之筆寫綿

遜之思仲弟孔銳字素修亦工詩有人蜀滇遊二集紀其山川風物懷抱清負音節悲壯相為激發讀者悲焉

虛堂公興泉字問樵邑增生能詩以落花一首著名人稱落花先生豐幹修髯儀容甚偉其詩以杜陵為宗與同邑

張秋涪曾啟童二樹鉅最善遍遊燕齊楚蜀詩多雄渾高亮之作著有虛堂集一枕窩詩集兩中消夏錄諸書行世

三崧公孔振字範治雍正癸丑進士翰林院編修國史館纂修戊午順天鄉試同考詩才敏贍著有小安樂高詩文集行世

于巢公孔鏞字梁貢廩貢生雍正初保舉人才不就獨居養志所著華林莊詩集

花龕公興泉字潤川乾隆甲午舉人山西平定州州判授學于惜抱文辭豔發詩賦清新所作多為人傳誦著有花龕集

問松公喬齡字錫九嘉慶辛酉拔貢本科舉人戊辰進士

殿試授內閣中書改湖南知縣甫至而卒白少即以制藝著稱每試必冠其曹詩賦尤清麗可頌著有聽松閣詩文集

山青公維藩字价人嘉慶丁卯舉人辛未進士授庶吉士改山西石樓縣知縣惠愛士民有聲工詩文清深綿麗頗

似漁洋山人著有天放齋詩文集卒于官無子以從兄子思贊為後詩文集多散佚其門人族弟瑩掇拾之

姚氏先德傳卷之五終

姚氏先德傳卷之六

隱逸

先杏林公楫字世用參政第三子賦質清異讀書過目成誦少隨參政宦遊惟恂恂退讓補邑庠生試輒首錄有文譽成化中例許諸生入粟錄用伯兄欲爲公請辭之參政有五子以公好學不事生產欲均以俸贖公泣而止之參政卒哀毀骨立戚友感動旣服闋兄弟有爲異者求析產公勸諭之不可乃取其最約曰資財在同氣中勝已囊也鄉試屢不中乃鵬冠鳩杖驅童僕而耕閒或作爲詩歌以抒其意已而歎曰古人有言不爲良相當爲良醫吾其終于是乎乃精求素問方書里中病者就公輒應手愈貧者爲藥施之鄉人或行不檢理譬誠感多所化革有不足隨

力所能爲助與人處終日無傲情之容怡怡愉愉人皆謂  
如飲醕醪而自守貞介終始不渝蓋所得于中者粹矣  
汝茂公之蓮克齋孫也性沈靜不苟言笑閉戶寡交遊于  
書無所不讀學使者按部至皖公半日投七藝補郡庠兄  
卒撫遺孤如己子祖遺絲粟擇善者予之授經弟子多獲  
雋者遺以金皆不受流寇逼桐城公奉母避山中猶挾書  
以行外兄方孔昭爲楚撫念公貧致金三千公謝曰貧者  
士之常何煩厚累故人乎歲旱鄰人侵田開水道公曰可  
灌若田甚善但旱久車薪杯水足乎其人感愧而止竊穀  
者伏舍旁出卒遇公公疾走不顧家人尤之公曰羞惡之  
心人所同有吾不忍見其忸怩也家故貧又狷介而戚友  
緩急必拮据濟之焚券甚多年四十八卒後數十年里中

人猶懷之學者稱汝茂先生曰克齋之孫真理學也  
蓬庵公孫枝字宜孫汝茂公子蚤孤事母鄭氏以孝聞鄭  
暴卒不及白醫遂自矢雖病不藥父名之蓮終身不食蓮  
實爲族長繩族人以禮婚嫁逾時者輒語端恪分俸完之  
歲凶則科其有餘者令出粟食之嘗自貸米三十斛至鄰  
有喪不能舉周之以其半來春啖麥粥自如少工舉子業  
既讀其祖克齋語錄遂專心濂洛之學家居講授稱大師  
作舟公士莊字穉蒸蟄存公文鼈子事親以孝聞執喪哀  
毀不勝事無鉅細必咨稟於伯兄教弟竭誠以愛析爨日  
獨閉戶泣一切勿問惟收藏圖書數卷而已文章駿偉詩  
學香山放翁有放山集二十卷愛西山之勝舉家就隱多  
蒔花竹飲酒賦詩以耕讀終近數十里皆感其德而化之

姚氏先德傳卷之六終  
公歿卽葬山之陽喬木森然至今相戒無敢伐者其遺澤  
及人如此

姚氏先德傳卷之六終



